

Ա Մ. ՊՈՂՈՍՅԱՆ

ՀԱՅԵՐԻ ՄԱՍՆԱԿՏՈՒԹՅՈՒՆԸ 1828—1829 ԹԹ. ՈՌՍ-ԹՈՒՐԿԱԿԱՆ
ՊԱՏԵՐԱԶՄԻ ԿՈՎԿԱՍՅԱՆ ՌԱԶՄԱՆԱԿԱՏՈՒՄ

Հեռավոր անսլալից են գալիս հայ և ռուս ժողովուրդների ռազմական կապերը: Այդ կապերն ավելի քան ծավալվեցին և խորացան XIX դարի առաջին երեք տասնամյակներում տեղի ունեցած ռուս-պարսկական և ռուս-թուրքական պատերազմների ժամանակ:

Ազնվականական-բուրժուական պատմաբաններ Ն. Դուբրովինը, Վ. Պոտտն, Ուշակովը, Շչեքբատովը, Պ. Զուբովը և ուրիշներ¹ իրենց աշխատություններում նկարագրել են ռուս-թուրքական պատերազմում Կովկասյան կորպուսի՝ դեպի Հայաստան կատարած արշավանքները: Նրանք զգալի քանակությամբ նյութեր են կուտակել ռազմական գործողությունների վերաբերյալ: Սակայն նրանք անտեսել են, կամ հարևանցիորեն անդրադարձել, այդ պատերազմի Կովկասյան ռազմաճակատում հաղթանակի հասնելու գործում կարևոր նշանակություն ունեցող հայ և ռուս ժողովուրդների ռազմական համագործակցությանը՝ հայերի կողմից Կովկասյան կորպուսին ցույց տված ռազմական, նյութական ու բարոյական օգնությունը:

1828—1829 թթ. ռուս-թուրքական պատերազմի Կովկասյան ռազմաճակատում մղված պատերազմական գործողությունների պատմության հարցին անդրադարձել են նաև արևմտյան պատմաբանները², որոնք հիմնականում ելալիս ունենալով իրենց կառավարությունների գաղութարարական նպատակները Մերձավոր արևելքում՝ պատերազմի ամբողջ հանցանքը բարդել են Ռուսաստանի վրա: Նրանցում անտեսվել է այն հանրահայտ ճշմարտությունը, որ Թուրքիայի ամբողջականության պաշտպանի դերում իրենց պետությունների հանդես գալիս սոսկ մի քոչ էր թաքցնելու Մերձավոր արևելքում նրանց տիրապետությունն ամրապնդելու քաղաքականությունը: Նրանք, ունենալով որոշակի նպատակ, բոլորովին չեն անդրադարձել այդ պատերազմի ժամանակ Թուրքիայի տիրապետության տակ գտնվող հայության հետապնդած նպատակների հարցին:

¹ Дубровин Н., История войны и владычества русских на Кавказе, СПб, 1888, Потто В., Кавказская война в отдельных очерках, эпизодах, легендах и биографиях, Тифлис, 1887, Ушаков, История военных действий в Азиатской Турции в 1828—1829 гг., СПб, 1836, Щербатов, Генерал-фельдмаршал князь Паскевич, его жизнь и деятельность, СПб, 1888; Зубов П., Подвиг русских на Кавказе с 1800 по 1834 годы, СПб, 1836.

² La Russie l'Asie mineure ou campagnes du Marechal Paskewitch en 1828—1829. Paris, 1840.

Loarstellung des Russisch—Türkischen Krieges 1828 In Europa und Asien, Magdeburg, 1829. Witzleben.

Պատերազմի ժամանակ Կովկասյան հատուկ կորպուսին հայերի կողմից ցույց տրված օգնության հարցին անդրադարձել է հայ ազնվա-կղերական պատմագրության ներկայացուցիչ Ա. Երիցյանը³։ Նա բերում է մի շարք փաստեր, որոնք հաստատում են հայերի կողմից ռուսական զորամասերին ցույց տրված օգնությունը։ Սակայն նրա մոտ ավելի շատ շեշտված են էջմիածնի կաթողիկոսությունը, հայ կղերականները, քան ժողովրդական մասսաները։

Պատերազմի ժամանակաշրջանում կովկասյան ռազմաճակատում ծավալված ռազմական գործողությունների ընթացքում ռուսական զորամասերին հայերի կողմից ցույց տրված օգնության հարցերին անդրադարձել է նաև հայ լիբերալ պատմաբան Լեոն⁴, որի հետազոտած բազմաթիվ նյութերը խիստ արժեքավոր են հայերի կողմից ռուսական թափափին ցույց տրված օգնության փաստը հաստատելու համար։ Սակայն, երբ նա դիմում է այդ փաստերի մեկնաբանությանը, երբեմն մինչև վերջ հետևողական չի մնում և կարծես ափսոսանքով է խոսում հայերի կողմից ցույց տրվող օգնության մասին, որովհետև այն «արհամարհվում էր ռուս բյուրոկրատիայի կողմից»։ Նա չի կարողանում ըստ արժանվույն զնահատել ռուս և հայ ժողովուրդների ռազմական այն համագործակցությունը, որ փայլուն կերպով դրսևորվեց այդ պատերազմի ժամանակ։

Մեզ հետաքրքրող ժամանակաշրջանի ռուս և հայ ժողովուրդների ռազմական համագործակցության պատմության մարքսիստական ուսումնասիրության և զնահատման բնագավառում լուրջ աշխատանք կատարեցին սովետահայ պատմաբանները, հրապարակի վրա դնելով մի շարք մենագրություններ⁵, բրոշյուրներ և հոդվածներ։

Ռուս և հայ զենքի համագործակցությունը որպես երկու ժողովուրդների դարավոր բարեկամության կարևոր արտահայտություն, ըստ ամենայնի մարքսիստական ուսումնասիրության է ենթարկել պրոֆ. Զ. Դրիզորյանը⁶։ Սակայն, այս բոլորով հանդերձ հայ և ռուս զենքի հեռավոր անցյալից եկող համագործակցության պատմության ասպարեզում դեռ կան ոչ լրիվ ուսումնասիրված էջեր, որոնցից մեկի լուսաբանմանն էլ նվիրվում է այս հոդվածը։

* * *

Նոր էր ավարտվել 1826—1828 թթ. ռուս-պարսկական պատերազմը, երբ 1828 թ. ապրիլի 14-ին սկսվեց ռուս-թուրքական պատերազմը բալկանյան և կովկասյան ռազմաճակատներով։

Կովկասյան ռազմաճակատում պատերազմական գործողությունները հիմնականում ծավալվեցին Ախալցխայի, Կարսի, Բայազետի, էրզրումի, Մուշի և

3 Ա. Երիցյան, Լեմենայն հայոց կաթողիկոսությունը և Կովկասի հայք 19-րդ դարում, մաս Ա, Բփղիս, 1894։

4 Լեո, Հայոց պատմության նորագույն շրջան, մաս 2, Երևան, 1927։

5 Պարսամյան Վ. Ա., Հայաստանի միացումը Ռուսաստանին, Երևան, 1940, Երիբոյեղովը և հայ-ռուսական հարաբերությունները, Երևան, 1947, Դեկաբրիստները Հայաստանում, Երևան, 1958, Ներսիսյան Մ. Գ., Դեկաբրիստները Հայաստանում, Երևան, 1958, Երիզորյան Զ. Տ., Արևելյան Հայաստանի միացումը Ռուսաստանին 19-րդ դարի սկզբին, Մոսկվա, 1959, Հայ և ռուս ժողովուրդների դարավոր բարեկամությունը, Երևան, 1960։

6 Գրիզորյան Զ., Ռուս և հայ ժողովուրդների ռազմական համագործակցությունը 19-րդ դարի սկզբին, Երևան, 1957։

Վանի փաշայությունների տերիտորիաներում, որոնց բնակչության զգալի մասը հայեր էին: Պատմական Հայաստանի այդ տերիտորիան ուներ կարևոր ռազմաստրատեգիական նշանակություն: Այն իր բնական ու արհեստական բազմաթիվ ամրություններով թուրքերի համար այնպիսի երկրամաս էր, որ հնարավորություն էլ տալիս մոբիլիզացնել մեծ բանակի կենդանի ուժ, կուտակել կենսամթերքի ու կերի հսկայական պաշարներ և, որ կարևորն է, հարձակվող բանակների դեմ ունենալ ամրացված պաշտպանական դիմ: Պատահական չէր, որ թուրքերը, հաշվի առնելով այդ տերիտորիայի բնական և արհեստական ամրությունները, սույն կարծիքին էին, որ ռուսները որևէ հաջողություն ունենալ չեն կարող:

Հիրավի, այդ ամենը թուրքերի համար առավելություն էր, բայց Արևմտյան Հայաստանում ռուսներն ունեին ավելի առավելություն. նրա բնակչության մեծամասնություն կազմող հայ զանգվածները ջերմ համակրանքով էին լցված դեպի ռուսական բանակը, որի հաղթանակի հետ կապում էին թուրքական լուծը թոթափելու իրենց ակնկալությունները: «...Մոտիկ լինելով Ռուսաստանին հավատի տեսակետից,—գրում է Ուշակովը,—նրանք (հայերը—Ա. Պ.) մեծ հրճվանքով էին դիմավորում» մեր զորքերին⁷:

Պատերազմի հենց սկզբից ռուսական զորամասերին ռազմական օգնություն ցույց տվեցին նաև արևմտահայերը: «Պատերազմի սկզբում նրանք,—դրում է պրոֆ. Զ. Գրիգորյանը,—մեծ մասամբ մտնում էին երևանի մարզից եկած հայկական աշխարհազորային ջոկատների մեջ և ռուս զինվորների հետ սերտ մարտական համագործակցությամբ, մեծագույն քաջությամբ ու անձնազոհությամբ կռվում էին թուրքական բանակների դեմ»⁸:

Հայերի՝ դեպի ռուսներն ունեցած համակրանքի մասին հայտնի էր նաև թուրքական իշխանություններին և հենց այդ պատճառով էլ նրանք սահմանամերձ հայ բնակչությանը քշել էին երկրի խորքը: Այդ մասին գեներալ Պասկևիչը իր զեկուցագրերից մեկում գրում է. «Ամբողջ այն երկրամասը, որ բնակեցված էր հայերով, այժմ ամբողջովին դատարկված է, որովհետև թուրքական կառավարությունը բոլոր բնակիչներին քշել է հեռավոր խորքերը»⁹:

ՍՍԻՄ պետական կենտրոնական ռազմա-պատմական արխիվում պահպանվող բազմաթիվ փաստաթղթեր վկայում են, որ թուրքերը շատ հայերի քշում էին Անատոլիայի խորքերը՝ վախենալով այն բանից, որ նրանք ռուսական բանակին ցույց կտան այնպիսի սիրալիր վերաբերմունք, ինչպիսին ցույց տվին ռուս-պարսկական պատերազմի ժամանակ¹⁰:

Կովկասյան կորպուսի հրամանատարությունը, ունենալով ռուս-պարսկական պատերազմի փորձը, 1828—1829 թթ. ռուս-թուրքական պատերազմի նախօրյակին ավելի վստահորեն սկսեց հայ և անդրկովկասյան մյուս ժողովուրդներից աշխարհազորային ջոկատների կազմակերպման գործը: Դա ուներ իր որոշակի պատճառները: Դեռ շարունակվում էր ռուս-պարսկական պատերազմը, իսկ այդ օրերին թուրքական հրոսակները հաճախակի ասպատա-

7 История военных действий в Азиатской Турции в 1828—1829 годах, СПб, 1836, стр. 75.

8 Զ. Գրիգորյան, Ռուս և հայ ժողովուրդների ռազմական համագործակցությունը 19-րդ դարի սկզբին, Երևան, 1957, էջ 172:

9 ЦГВИА, ф. ВУА, д. 4644, лл. 65—66.

10 Նույն տեղում, թ. 5—6:

կում էին Հայաստանի սահմանները։ Անհրաժեշտ էին ուժեր՝ սահմանային ծառայության համար։ Պակաս նշանակություն չունեցավ նաև Թուրքիայի կողմից Ռուսաստանի դեմ պատերազմի նախապատրաստվելը, որն արագացնում էին արևմտա-եվրոպական պետությունները։ Թուրքիան այդ ժամանակ կովկասյան ճակատում հարձակողական գործողությունների համար ուներ 40-հազարանոց բանակ, իսկ ռուսներն այդ նպատակի համար կարող էին հանել միայն 14 հազար զորք։ Բնականաբար, հարկ կար կորպուսի ուժերը համալրել տեղական ժողովուրդներից ձևավորված աշխարհազորային ջոկատներով։

Հայերից աշխարհազորային ջոկատներ կազմակերպելու վերաբերյալ ռուսական բանակի հրամանատարության մտադրության հաստատման համար կարևոր փաստաթուղթ է գեներալ Կրասովսկու 1828 թ. հունվարի 5-ի զեկուցագիրը բանակի գլխավոր շտաբին։ «Կրասովսկին,—գրում է պրոֆ. Զ. Գրիգորյանը,—իր զեկուցագրի մեջ զարգացնում է այն միտքը, թե հայկական մարզի բնակչությունից կամավոր սկզբունքներով հնարավոր է կազմակերպել 2000 մարդուց կազմված աշխարհազոր։ Նա իր լիակատար վստահությունն է հայտնում այն մասին, որ առաջիկայում անհետաձգելիորեն հնարավոր է ձևավորել մի գունդ՝ կազմված 400 հեծյալներից և 800 հետևակայիններից»¹¹։

Կրասովսկու զեկուցագրից պարզ կերպով երևում է, որ նա ցանկանում էր այդ ճանապարհով լրացնել կորպուսի սակավաթիվ ուժերը, խաղաղ ժամանակ դրանք օգտագործելով պահակային ծառայության համար, իսկ հարկ եղած դեպքում նաև ռազմաճակատներում¹²։

Ռուսական բանակի հրամանատարությունը որոշել էր Կովկասում թուրքերի դեմ օգտագործել ռուս-պարսկական պատերազմում կովկասյան ժողովուրդներից կազմակերպված ջոկատները և շարունակել նման ջոկատների կազմակերպումը։ Այդ մասին է վկայում նաև 1828 թ. փետրվարի 18-ին ռուսական բանակի գլխավոր շտաբի պետ գեներալ Դիրիշի ուղարկած հրահանգը Թիֆլիսի գեներալ-նահանգապետ Սիպյագինին։ Այդ մասին հավաստի նյութեր կան գեներալ Պասկևիչի բազմաթիվ զեկուցագրերում¹³։

Դեռ նոր էր սկսվել պատերազմը, երբ Հայաստանի տարբեր մասերում կազմակերպվեցին կամավորական հեծյալ և հետևակային ջոկատներ, որոնք ռուսական բանակի հետ միասին հանդես եկան ընդհանուր թշնամու դեմ։ «...Երբ 1828 թռվին սկսեցաւ օսմանեան պատերազմը,—գրում է Ա. Երիցյանը,—Արարատեան աշխարհի հայք տուին մոտ 2000 հետևակ զորք սարբադ անունով և մոտ 800 հոգուց բաղկացած հեծելազունդ, որոնք այնուհետև անբաժան էին ռուսաց յառաջ ընթացող բանակից»¹⁴։

Ռուսական բանակը Արևմտյան Հայաստան մտնելուց հետո ականատես եղավ հայաբնակ բաղաքների ու գյուղերի բնակիչների ջերմ վերաբերմունքին։ Հայերը ոչինչ չէին խնայում ռուսական բանակին օգնելու գործում՝ համոզված

11 Զ. Գրիգորյան, Ռուս և հայ ժողովուրդների ռազմական համագործակցությունը 19-րդ դարի սկզբին, Երևան, 1957, էջ 165։

12 Նույն տեղում, էջ 167։

13 ЦГБИА, ф. БГА, д. 4329, 17348, 4644.

14 Ա. Երիցյան, Ամենայն հայոց կաթողիկոսությունը և Կովկասի հայք 19-րդ դարում, մաս Ա, Թփղիս, 1894, էջ 453։

լինելով, թե որտեղ ոտք դնի ոռոսական բանակը, այն վայրը քնդմիշտ կազատվի թուրքական լծից:

Նկատի ունենալով Կարսի ռազմա-ստրատեգիական կառույցը նշանակությունը, նրա՝ որպես «Հայաստանի պատվար» և էրզրումի բանալի լինելու հանգամանքը, Կովկասյան կորպուսը, սկսելով ռազմական գործողությունները, առաջին պլանի վրա գրեց այդ նշանավոր ամրոցի գրավումը: Կորպուսի գլխավոր հրամանատար գեներալ Պասկևիչը Կարսի գրավմանն առաջնակարգ նշանակություն տվեց, նկատի ունենալով, որ Կարսը համարվում էր հակառակորդի հիմնական բազան, նրա գրավումով կբացվեր հետագա ազատ գործողությունների հնարավորություն, կապահովվեին Գյումրիի սահմանները և Ախալցխան կկտրվեր էրզրումից: Ներկրամասն աչքի էր ընկնում նաև իր բերքատվությամբ, բարենպաստ կլիմայով, բնակչության զգալի մաս կազմող հայերը հակված էին դեպի ռուսները:

Թուրքերը, քաջ դիտակցելով Կարսի նշանակությունը, ըստ ամենայնի ամրացրել էին այն, ծրագրելով այնտեղից էլ Կիոս-Մամեդ փաշայի 60 հազարանոց բանակով հարձակում սկսել Գյումրի և Նրևանի ուղղություններով ու գրավել Թիֆլիսը:

Ռուսական կորպուսը 12—15 հազարանոց բանակով Ախուրյան գետն անցավ հունիսի 14-ին: Մինչև հունիսի 23-ը կատարվեց Կարս բերդի ու նրա ամրությունների հետախուզությունը: Այդ գործում ռուսական հրամանատարությունը զգալի ծառայություններ մատուցեցին տեղացի հայերը: Նրանք լավ ծանոթ լինելով տեղանքին՝ ցույց էին տալիս ամրոցի ավելի թույլ պաշտպանված մասերը, տեղեկություններ հայտնում թուրքական ուժերի և նրանց շարժման մասին: «Այստեղի բրիստոնյաները, — կարդում ենք գեներալ Պասկևիչի մի զեկուցագրում, — մեր նկատմամբ մեծ վստահությամբ են լցված»¹⁵: Նման կարգի մի այլ փաստաթղթում ասված է. «Մեր հրամանատարությունը ամենամանրամասն և կարևոր տեղեկությունները հայտնում են տեղացի հայերը»¹⁶:

Ամրոցի հետախուզությունը ցույց տվեց, որ այն կարելի է շրջանցել միայն հարավ-արևմտյան կողմից՝ Շորոխյան բարձունքներից: Հենց այստեղից էլ հունիսի 23-ին սկսվեց գրոհը: Թուրքերը կատաղի դիմադրություն ցույց տվեցին: Նրանց օգնության էր շտապում Կիոս-Մամեդ փաշան՝ իր 15 հազարանոց բանակով, որն արդեն գտնվում էր Կարսից հինգ կիլոմետրի վրա: Թերևս այդ էլ դարձավ պատճառներից մեկը, որ ռուսական գրոհող զորամասերը շատ ուղղություններում գիմելով սվինամարտի՝ կոտրեցին հակառակորդի դիմադրությունը, մեկը մյուսի հետևից գրավեցին Կարսի վրա իշխող ամրությունները և մինչև թուրքական օգնության շտապող ուժերը կհասնեին, Կարսն արդեն գրավված էր, նրա պատերի վրա ծածանվում էր ռուսական դրոշմը:

Կարսի արագ անկումը արդյունք էր ամենից առաջ Կովկասյան կորպուսի մարտունակությանը, նրա շարքերում Կովկաս արսորված դեկաբրիստներ Ե. Լաչինովի¹⁷, Ի. Պուշկինի, Ա. Գալկերովի, Բ. Բեստուժևի և շատ ուրիշ-

¹⁵ ЦГВИА. ф. ВУА. д. 4644, л. 75.

¹⁶ Նույն տեղում, գ. 4646, թ. 112:

¹⁷ Ե. Լաչինովը հրամանատարության կողմից ամրացված է եղել հայկական կամավորական մի զրուժինայի, դինվորական ծառայության ուսուցման նպատակով (ЦГВИА Арх. СССР, ф. 342, оп. 1, д. 7, л. 70 и об.).

ների գտնվելուն, ինչպես նաև անգրկովկասյան ժողովուրդների կողմից ռուսական կորպուսին ցույց տրված ակտիվ օգնության: Քիչ նշանակություն չունեցան նաև թուրքական հրամանատարությունն թույլ տրված ախալները:

Կարսի գրավման հերոսամարտում աչքի ընկնող դեր խաղացին հայերը: Դեռևս պաշարման շրջանում թուրքական հրամանատարությունը, հակառակ հայերի կամքի, զինեց նրանց և հսկողություն սահմանելով՝ ստիպեց կռվել ռուսների դեմ, սակայն իսկ սխալվեց իր հաշիվներում, որովհետև, ինչպես պրում է լեոն, «նրանք կամ փախչում, գնում էին ռուսական բանակ, կամ օգնում էին ռուսական զինվորներին՝ բարձրանալ բերդի պատերի գլուխ և ներս թափվել»¹⁸: Այդ է հաստատում նաև Պոտտոն: «Հայերը,—գրում է նա,—օգնում էին ռուս զինվորներին բարձրանալու պատերի վրա: Զինվորները մեկ-մեկ թռչում էին ներքև, վազում բաց անելու դռները»: Այդ բանը,—շարունակում է նա,—կատարվում էր այնպես արագ, զորքերի այնպիսի հիանալի մասնակցության պայմաններում, որ թուրքերը կորցրել էին գլուխները, չէին հասկանում. թե ինչ է կատարվում իրենց շուրջը»¹⁹:

Կարսը գրավելուց հետո տեղական հայերը կազմակերպեցին աշխարհագորային ջոկատներ, որոնք կատարում էին պահակային և այլ կարգի ծառայություններ²⁰: Սակայն դրանով չէր սահմանափակվում Կարսի հայերի օգնությունը ռուսական բանակին: «Կարսի հայերը,—կարդում ենք մի փաստաթղթում,—այնքան ակնհայտ դրսևորեցին կողմնորոշումը դեպի ռուսական բանակը, որ կազմեցին հայկական կամավորական երկու դրուժինա՝ մեկը հեծյալ, մյուսը՝ հետևակ, որոնք մտան ռուսական գործող բանակի կազմի մեջ»²¹:

Կարսը վերցնելուց հետո, Կովկասյան կորպուսի հրամանատարությունը ձեռնարկեց Ախալցխայի փաշայության գրավումը: Այն կարևոր էր ստրատեգիական ու տնտեսական տեսակետից: Նրա տերիտորիայում գտնվող Ախալցխա, Ախալքալաք, Արդահան և այլ ամրությունները տեպալեմբերից հետո գրավելը կդառնար դժվարին և նույնիսկ անհնարին: Շտապել պետք էր նաև այն պատճառով, որ հակառակորդն այնտեղ սկսել էր կուտակել նոր ուժեր, շնայած մինչ այդ միայն Ախալցխան իր արվարձանների հետ միասին ուներ 10 հազարից ավելի զորք²²: Ախալցխայի գրավման համար մոմենտը նպաստավոր էր նաև այն տեսակետից, որ էմին փաշան անշորժունեության մատնված, նստած էր Արդահանում՝ սպասելով ռուսների հալձակմանը այդ ուղղությամբ:

Ռուսական զորամասերը հունիսի 17-ին Ախալքալաքի վրայով սկսեցին շարժվել դեպի Ախալցխա նկատի ունենալով, որ վերջինիս գրավումով կամրապնդվեին ռուսական սահմաններն այդ ուղղությամբ: Հուլիսի 23-ին գրոհով գրավվեց Ախալքալաքը, հուլիսի 26-ին՝ զնդապետ Կոմարովի զորամիավորին, որի մեջ մտնում էր նաև հայկական կամավորական մի ջոկատ, անձնատուր եղավ իսկոթիսը:

Օգոստոսի 3-ին ռուսական առաջապահ զորամասերը կանգ առան Ախալցխայի պատերի տակ: Եղած հետախուզական տվյալները և նոր հետազոտո-

18 Տե՛ս լեոն, նշված աշխատությունը, էջ 188:

19 Потто В., Кавказская война, т. IV, ч. II, стр. 64.

20 ЦГИА Арм. ССР, ф. 342, оп. 1, д. 7, л. 9

21 ЦГВИА, ф. ВУА, д. 4644, л. 72.

22 Նույն տեղում, էջ 94—95:

թյունները ցույց տվեցին, որ ամբողջ կարելի է գրավել միայն գրոհով, սակայն տվելորդ կորուստներից խուսափելու նպատակով պահանջվեց այն կամավոր կերպով հանձնել: Թուրքական հրամանատարությունը, մերժելով ուսման պահանջը, տվեց գոռոզ ու հոխորտացող հետևյալ պատասխանը. «Մենք ո՛չ Երեւանի և ո՛չ էլ Կարսի բնակիչներ ենք, մենք ախալցխացիներ ենք, մեզ հետ ոչ կին կա, ոչ կարողություն, մենք կմեռնենք պատերի վրա, քայց ամբողջ չենք տա: Վաղուց մի ասացվածք կա, որ մեկ կարսեցին ծեծում է երեք երևանցու, իսկ երկու կարսեցին շարժեն մեկ ախալցխացու»²³:

Օգոստոսի 8-ին Ախալցխայում եղած կայազորին օգնության էր հասել 10 հազարանոց մի զորամիավոր: Նման պայմաններում ուսական բանակի ռազմական խորհուրդը քննարկման դնելով Ախալցխայի դրավման հարցը, ընդունեց դեկաբրիստ լաչինովի առաջարկը և որոշեց նախ քախջախել Ախալցխային օգնության եկած թուրքական ուժերին, իսկ հետո միայն սկսել ամրոցի վրա գրոհը: Այդ պլանի համաձայն օգոստոսի 15-ին սկսվեց ամրոցի գրոհը: Թուրքերը կատաղի դիմադրություն էին ցույց տալիս՝ վստահ լինելով իրենց գերազանց ուժերի վրա: Սակայն արդեն քաղաք մտած ուսական ուժերը, դիմելով ձեռնամարտի, դրավեցին ամրոցի շորս արտաքին պատերից լերեքը և ծանր կացություն ստեղծեցին թուրքական կայազորի համար: Օգոստոսի 16-ին Կիոս-Մամեդ փաշան կապիտուլյացիա խնդրեց:

Ախալցխայի համար մղվող մարտերին ակտիվ մասնակցեցին նաև հայերն ու վրացիները: Ամրոցի առաջին գրոհողների շարքում էր 70 հոգուց բաղկացած հայ կամավորների ջոկատը²⁴:

Ճիշտ է, քաղաքի բնակչության մի զգալի մաս կազմող հայերին և վրացիներին թուրքերը գլխավոր հարկադրել էին դուրս գալ ուսման դեմ, սակայն ոչ հայերը և ոչ էլ վրացիները ուսական բանակի դեմ չկռվեցին, ընդհակառակը, քաղաքում և ամրոցում ծավալված մարտերի ժամանակ նրանք օգնում էին գրոհող ուսական զորամասերին: Ախալցխայի համար մղված մարտերին ակտիվ մասնակցություն ունեցան հայ սպաներ Բեժանյանը, Ղորղանյանը, Շամիր Մելիք-Բեգլարյանը և ուրիշներ²⁵:

Քաղաքի և ամրոցի համար մղվող մարտերում հայ շարքային զինվորներից զոհվեցին 12 հոգի²⁶: «Ախալցխա և Խերթվիս բերդերի դրավման ժամանակ, — կարդում ենք մի փաստաթղթում, — մեծ ծառայություն մատուցեցին հայերը՝ կողք-կողքի կռվելով ուս զինվորների հետ»²⁷:

Օգոստոսի 22-ին գեներալ Բերխմանի զորաջոկատը, որի կազմի մեջ մտնում էր նաև հայկական մի կամավորական ջոկատ, գրավեց Արդահանը: Բիշ օգնություն ցույց չտվեցին ուսական զորաջոկատին նաև տեղացի հայերը²⁸:

Դեպի Արդահան շարժվող ուսական զորամասերը ազատագրեցին թուրքերի կողմից տեղահանված և դեպի էրզրում քշվող 33 հայ գյուղերի բնակիչներին: Երբ ազատագրված հայերը մեկնում էին իրենց բնակավայրերը, թուր-

23 Տե՛ս В. Потто, Кавказская война..., т. IV, ч. II, стр. 104.

24 ЦГВИА, ф. ВУА, д. 4644, лл. 203—204.

25 Տե՛ս Երիցյան, նշված աշխատությունը, էջ 402.

26 ЦГВИА, ф. ВУА, д. 4644, л. 204.

27 Նույն տեղում, թ. 75.

28 Նույն տեղում, թ. 203—204.

րերը հանկարծակի գրոհեցին նրանց վրա, ճնշում գործադրելով հայկական դին-ված փոքրաթիվ ջոկատի վրա: Այդ նկատելով՝ ռուս հետևակայիները մարտի մեջ մտան: Նրանցից ամեն մեկը նույնիսկ պատրաստ էր իր կյանքը տալ ան-դեն հայերի պաշտպանության համար²⁹:

Արդահանի գրավումով ավարտվեց Ախալցխայի փաշայության նվա-նումը: Այստեղ ևս Կարսի օրինակով ստեղծվեց զինվորական նահանգապետու-թյուն՝ գեներալ Վ. Բեհրուխովի գլխավորությամբ:

Ախալցխայի ամբողջ փաշայության դրավման ժամանակաշրջանում ծա-վարված մարտական գործողություններում ակտիվ մասնակցություն են ունե-ռել նաև Կովկաս աքսորված դեկաբրիստները: Մ. Պուշկինը գործուն մասնակ-ցություն է ունեցել Ախալցխայի գրոհի կազմակերպմանը:

Ախալցխայի դրավմանը մասնակցել են նաև Ն. Սևիշևը, Բ. Բեստուժևը, Ա. Վեդենյապինը, Բուրցևը, Վ. Վոլխովսկին³⁰ և ուրիշներ:

Կովկասյան կորպուսի հիմնական ուժերի հետ միասին ռազմական գոր-ծողություններ սկսեց նաև Նրևանյան ջոկատը: Նրա ուժերը սակավաթիվ էին՝ երկու հազար սվին, 340 սուր և հայ-ադրբեջանական կամավորական ուժեր: Սակայն ջոկատի հրամանատար Ա. Ճավճավաձեն, սկսելով ռազմական գոր-ծողությունները, համոզված էր, որ կհաղթեն, որովհետև մեծ հույսեր էր կա-պում Բայազետի փաշայության բնակչության հիմնական մասը կազմող հա-ւերի օգնության հետ: Իրոք, երբ օգոստոսի 27-ին ռուսական զորամասերը կանգ առան Բայազետի պատերի տակ, քաղաքի և շրջակա վայրերի հայերը ոտքի կանգնեցին: «Դարերով ճնշված հայոց ոգին,—գրում է Ա. Նրիցյանը,—կենդա-նացաւ ապագայ բարօրութեան յոյսով...»³¹: Տեղացի հայերը ռուսական բա-նակի հրամանատարությանը ճիշտ տեղեկություններ հայտնեցին թշնամու մա-սին: Երբ սկսվեց Բայազետի գրոհը, հայերը փաշային տեղյակ պահեցին, որ իրենք ուրախ են դրա համար և պատրաստ են օգնելու ռուսներին: Այդքանը բավական եղավ, որպեսզի ռուսական հրետանու առաջին կրակոցներից հետո բացվեն ամրոցի դռները: Քաղաքի հայերը, մեծ ոգևորությամբ ընդառաջ գնա-լով մոտեցող բանակին, ամրոցի բանալիները հանձնեցին հրամանատարին: «Հայերը,—գրում է Պոտտոն,—բացարձակ կերպով պայմաններ ստեղծեցին ռուսների համար, պատրաստ էին օգնելու նրանց և իրոք տվեցին հաց ու տե-ղեկություններ թշնամու մասին»³²: Բայազետի գրավման համար մղված մար-տական գործողություններին մասնակցեց նաև Նրևանի հայ-ադրբեջանական աշխարհադորային ջոկատներից մեկը:

Բայազետը գրավելուց հետո, նկատի ունենալով Դիադդինի հայ բնակ-չության ցանկությունը, այնտեղ ուղարկվեց Ծարդարաբադի հայկական հեծ-յալ 50 հոգուց բաղկացած և բայազետցիներից կազմված աշխարհազորը, որոնց մեծ սիրտլիրությամբ դիմավորեցին տեղացի հայերը: Շուտով Բայազետի և Դիադդինի օրինակին հետևեցին Խամուրի հայերը: Նրանք պատգամավորու-թյուն ուղարկեցին Բայազետ՝ ամրոցի բանալիները հանձնելու համար: Սեպ-տեմբերի 12-ին մի զորաջոկատ, որի մեջ մտնում էին նաև հայ կամավորներ, գրավեց Թորփադ-դալան (պատմական Վաղարշակերտ):

²⁹ Նույն տեղում, թ. 103—104:

³⁰ Մ. Ն եր ս ի ս յ ա ն, Դեկաբրիստները Հայաստանում, Երևան, 1958, էջ 68:

³¹ Տե՛ս Ա. Նրիցյան, Նշված աշխատությունը, էջ 406:

³² Տե՛ս Потто В., Кавказская война, т. IV, ч. 4, стр. 28:

Այսպիսով, տեղի հայ բնակչության հետ սերտ համագործակցության շնորհիվ երևանյան ջոկատին հաջողվեց կարճ ժամանակամիջոցում տիրել Բայազետի ամբողջ փաշայությանը: Այդ հաղթանակների գործում իր ակտիվ մասնակցությունն ունեցավ հայ ժողովուրդը, որի օգնությունը շահմանափակվեց միայն կամավորներ տրամադրելով: Նրանք ռուսական բանակին օգնեցին նաև բարոյապես ու նյութական միջոցներով: Բաղմաթիվ են դեպքերը, երբ հայերը կամ նվիրատվության կարգով, կամ էժան գներով ռուսական բանակին ևն տվել հաց, միս և զանազան տեսակի այլ մթերքներ: Նրանք իրենց ջրաղացներում աղացել են անհրաժեշտ քանակությամբ ցորեն և այլն³³: «Հայկական գյուղերի գյուղացիները, — կարդում ենք մի փաստաթղթում, — սիրով հնձում են նաև թուրքերի ցանած հողերը՝ մեր բանակը հացով ապահովելու համար»³⁴: Հայերը, ոգևորված այն բանից, որ ռուսների հաղթանակն իրենց ազատություն է բերում թուրքական լծից, հնարավոր բոլոր միջոցներով օգնում էին ռուսական զորամասերին³⁵: Նրանք շատ դեպքերում դուրս էին գալիս դաշտ աշխատանքի զինված, հարկ եղած դեպքում թշնամու հարձակումները կանխելու նպատակով: «Պարենամթերքի հարցը, — գրում է Պոտտոն, — ոչ մի կերպ ռուսներին չի դժվարացրել, Արդահանի սանջակը և Ալաշկերտի հովիտը... կարող էին կերակրել ոչ միայն այդպիսի ուժեր, այլև ավելին»³⁶: Հայտնի են բազմաթիվ դեպքեր, երբ զինված հայերը հարձակվել են թուրքական գումակների վրա, բռնագրավել նրանց պաշարները, գյուղերից քշված անասունները և հանձնել ռուսական զորամասերին³⁷: Նյութական զգալի օգնություն են կազմակերպել նաև հայ միջնորդ առևտրականները, որոնք էժան գներով զանազան կենսամթերքներ են գնել և իրենց միջոցներով հասցրել հրամանատարության պահանջած վայրերը³⁸: Պատերազմի հենց սկզբից հայերը ռուսական բանակին տրամադրեցին 450 սայլ, 2250 բեռնակիր անասուն և այլ փոխադրական միջոցներ³⁹:

Բերված և նման կարգի բազմաթիվ այլ փաստերն ասում են այն մասին, որ, չժխտելով ռուսական Կովկասյան կորպուսի մարտունակությունը, նրա շարքերում կովող դեկաբրիստների խաղացած դերը, միաժամանակ չպետք է մոռանալ, որ Կովկասյան կորպուսի 1828 թ. ռազմական գործողություններում ունեցած փայլուն հաջողությունների գործում իր որոշակի բաժինն ունի անդրկովկասյան և առաջին հերթին հայ ժողովրդի՝ ռուսական զենքի հետ համագործակցությունը:

Այսպիսով, 1828 թ. ռազմական գործողությունները վերջացան ռուսների փայլուն հաղթանակով: Գրավվեց երեք փաշայություն, 9 ամրոց, 315 հրանոթ, 195 դրոշ և այլ ռազմավար⁴⁰:

Թուրքական բանակի հրամանատարությունը, իր անգլիական հովանավորների օգնությամբ ջանում էր 1829 թ. կամպանիայի ժամանակ ոչ միայն

³³ ЦГВИА, ф. ВУА, д. 4644, лл. 94—95.

³⁴ ЦГИА, Арм. ССР, ф. 342, оп. 1, д. 7, л. 57.

³⁵ ЦГВИА, ф. ВУА, д. 4338, лл. 30—32.

³⁶ «Утверждение русского владычества на Кавказе», т. IV, стр. 160.

³⁷ ЦГВИА, ф. ВУА, д. 4258, лл. 34—40.

³⁸ ЦГВИА, ф. ВУА, д. 4644, лл. 40—43.

³⁹ «Утверждение русского владычества на Кавказе», т. IV, ч. II, стр. 15.

⁴⁰ Նույն տեղում, էջ 159:

ևս խլել 1828 թ. կորցրածը, այլև իրագործել Անդրկովկասից ռուսներին դուրս մղելու և այն տիրելու իր վաղեմի նվաճողական ծրագիրը:

Անգլիան, Ֆրանսիան և Ավստրիան, անհանգստանալով Ռուսաստանի 1828 թ. ձեռք բերած հաջողություններից, սկսեցին ուժեղացնել իրենց օգնությունը Թուրքիային: Անգլիացիները պրակտիկ գործունեություն ծավալեցին՝ Ռուսաստանի դեմ ստեղծելու թուրք-պարսկական դաշինք: Հենց այդ քաղաքականության զուգահեռ դարձավ Թեհրանի ռուսական դեսպան Գրիբոյեդովը: Սակայն անգլիացիները հաջողության չհասան, որովհետև ռուսական բանակի արագ հաղթանակները ասիական Թուրքիայում ստիպեցին պարսկական շահին ներումն խնդրել Ռուսաստանից՝ Գրիբոյեդովի շարանենգ սպանության համար:

Իր 1829 թ. ռազմական պլանն իրագործելու նպատակով թուրքական հրամանատարությունը 60-հազարանոց բանակ կենտրոնացրեց էրզրումում՝ նոր սերասկյար Հաջի-Սալախ փաշայի հրամանատարությամբ, 50-հազարանոց մի բանակ առանձնացվեց Բայազետի և 60-հազարանոց մի բանակ՝ Ախալցխայի ուղղություններից հարձակում սկսելու համար: Ընդհանուր առմամբ նախատեսվում էր կովկասյան ճակատում բանակի քանակը հասցնել մոտ 200 000 մարդու⁴¹: Թուրքական հրամանատարությունը նախատեսում էր իր այդ բանակով հարձակում սկսել Ախալցխայի, Կարսի և Բայազետի ուղղություններով, դրավել դրանք և ներխուժել Անդրկովկաս:

1829 թ. կամպանիային նախապատրաստվում էր նաև Ռուսաստանը: Կովկասյան կորպուսի ուժերը հակառակորդի համեմատությամբ սակավաթիվ էին: Շտապ կարգով նոր ուժեր երկրի կենտրոնական մասերից չէր սպասվում: Կորպուսի ուժերը համալրելու համար բանակի հրամանատարությունը նորից դիմեց տեղական միջոցներին:

Բայազետի փաշայությունում ձևավորվեց հայկական հետևակ և հեծույզ զոնդ⁴²: Կարաում զենքի ընդունակ բոլոր մարդիկ զինվեցին և մտան բերդի պաշտպանության ծառայության մեջ⁴³: Նոր կազմակերպված աշխարհազորային ջոկատներ ուղարկվեցին սահմանային ծառայության: «Հայկական աշխարհազորը, — գրում է Կարսի մարզի կայազորի պետը՝ բարոն Սակկենին, — հաճությամբ է կատարում իր վրա դրված սահմանային պաշտպանության պարտականությունը...»⁴⁴:

Հայերը ռուսներին ակտիվ օգնություն ցույց տվեցին 1829 թ. Ախալցխայի պաշտպանության ժամանակ, որի կազմակերպիչն էր ամրոցի կայազորի պետ զենեռալ Վ. Բեհբուժովը: Երբ փետրվարի 17-ին թուրքերը մեծաքանակ ուժերով օղակեցին Ախալցխան, այնտեղ Բեհբուժովի գլխավորած կայազորը, չնայած իր սակավաթիվ լինելուն, չվհատվեց և շրջակա ամբողջ քրիստոնյա բնակչությանը զինելով՝ հերոսաբար պաշտպանեց քաղաքն ու ամրոցը՝ մինչև օգնական ուժերի հասնելը⁴⁵: Ամրոցի պատերի տակ առաջին չուրջ դիմադրությունը թուրքերին ցույց տվեցին զինված հայերն ու հրեաները⁴⁶: Երբ թուրքական փա-

⁴¹ Տե՛ս «Утверждение русского владычества на Кавказе», т. IV, ч. II, стр. 163.

⁴² Նույն տեղում, էջ 66:

⁴³ ЦГИА Арм. ССР, ф. 342, оп. 1, д. 7, л. 13.

⁴⁴ Նույն տեղում, թ. 70:

⁴⁵ Ախալցխայի պաշարման լուրը կորպուսի հրամանատարին հասավ Շորագյալի բնակիչ կապավոր Գարրիկի միջոցով:

⁴⁶ ЦГИА Арм. ССР, ф. 342, оп. 1, д. 7, л. 20.

շան պահանջեց անձնատուր լինել, Բեհբուլոկը նրան պատասխանեց. «...Ռուսներն ամրոցներն այլ կերպ չեն հանձնում, քան միայն խաղաղության պայմանագրով, այն էլ մեծահոգի գտնվելով: Ունենալով իմ հրամանատարության տակ քաջ կայազոր և ամեն ինչ ամրոցի պաշտպանության համար, ես ոչ մի այլ բան չեմ մտածում, քան համարձակ գիմադրության, որի համար ես վաղուց արդեն պատրաստ եմ»⁴⁷: Բեհբուլոկին արդեն հայտնի էր, որ Ախալցխա են շտապում օգնական ուժեր, որոնք մարտի սկզբին Բորժոմի կիրճում ջախջախեցին թուրքական Ավդի բեկի կորպուսը, որից էլ սարսափած ամրոցն օղակող Ահմեդ փաշան թողեց պաշարումը և խուճապահար փախուստի դիմեց: Ախալցխայի պաշտպանության գործում կարևոր նշանակություն ունեցավ նաև Բեհբուլոկի անձնական օրինակը: Այդ փաստը նույնիսկ նշեց փառասեր Պասկևիչը. «Ինքը, իշխան Բեհբուլոկը, — գրել է նա, — անձնական օրինակով ողբվորել է բոլորին...»⁴⁸:

Մինչդեռ Կովկասյան կորպուսը ճախապատրաստվում էր զարնանային զլխավոր ռազմական գործողությունների, տեղական նշանակություն ունեցող մարտերում աչքի ընկան հայ աշխարհագրորային ջոկատները: Այսպես, օրինակ՝ 1829 թ. մայիսին Կարսի փաշայությունից բարոն Սակկենին գրված մի զեկուցագրում ասված է, որ Պաշնայի շրջանում հակառակորդի ջոկատները սպառնալիք են ստեղծում Կաղզվանի սանջակի համար, իսկ մարզի ամբողջ «...հայկական աշխարհագրորդ հիմա կենտրոնացված է Սողանլուղի ուղղությամբ, դիմադրելու համար թշնամու ավազակային բանդաներին»⁴⁹: 1829 թ. ապրիլի 8-ին Արդահանի կայազորի պետը Կարսի մարզի գեներալ-նահանգապետին հայտնում է, որ իր կողմից պետական կարևոր փաստաթղթերով Կարս ուղարկված երկու հայեր բռնվել և խոշտանգվել են⁵⁰: Նույն թվականի մայիսի 5-ին Պասկևիչը Սակկենին խնդրում է հայերից առանձնացնել ուժեղ հետախուզություն հակառակորդի մասին ճիշտ տեղեկություններ հավաքելու համար⁵¹: Այդ նույն ժամանակաշրջանում Կարսի բոլոր դարբասների պահակությունը հանձնված էր հայերին: Այդ մասին ամրոցի պարետի զեկուցագրում՝ ուղղված նահանգապետին, ասված է. «Բոլոր դարբասների վրա պահակներ են կարգված հայ ավազներից, որոնց վրա լրիվ կարելի է վստահել, նրանք ոչ մի ձևով թույլ չեն տա ամրոց մտնել կամ այնտեղից դուրս թողնել որևէ մարդ»⁵²: Կարսի նահանգապետի մի այլ զեկուցագրում՝ նորից ուղղված Սակկենին, հիշատակվում է Թիֆլիսի բնակիչ Արծրունին, տրբ որպես հետախույզ ուղարկվել է էրզրում և բերել հավաստի տեղեկություններ թուրքական բանակի և այնտեղի ընդհանուր դրության մասին⁵³: Ռուսական հրամանատարությանը էրզրումից կարևոր տեղեկություններ է հայտնել նաև լեպիսկոպոս Անսոնիոն⁵⁴: Կովկասյան համարյա բոլոր սահմաններում եղել են հայկական հեծյալ պարեկներ, որոնք հիանալի կերպով կառարել են իրենց պարտականությունները»⁵⁵:

47 *Տե՛ս* «Утверждение русского владычества на Кавказе», т. IV, ч. II, стр. 168.

48 Նույն տեղում, էջ 185—186:

49 ЦГИА Арм. ССР, ф. 342, оп. 1, д. 7, л. 74 и об.

50 Նույն տեղում, գ. 2, թ. 29 և հակ.:

51 Նույն տեղում, թ. 102:

52 Նույն տեղում, թ. 70:

53 Նույն տեղում, գ. 1, թ. 15—16:

54 ЦГИА Арм. ССР, ф. 342, оп. 1, д. 7, лл. 55—56.

55 Նույն տեղում, թ. 75:

Դեպի էրզրում շարժվող ռուսական բանակին զրկաբաց են ընդունել հայերը: Ինչպես գրում է Երիցյանը, երբ Պասկևիչն առաջ էր շարժվում դեպի էրզրում, նրան խումբ-խումբ դիմավորում էին Բասենի հայ գյուղացիները: «...իրենց ունեցած շոնեցածն անկեղծ աիրով ընծա էին բերում ռուսաց զորքին»⁵⁶: Դեպի էրզրում տանող ճանապարհին առաջին ճակատամարտը տեղի է ունեցել հունիսի 17-ին, որտեղ թուրքական Օսման փաշայի զլխավորած բանակը կրել է խայտառակ պարտություն: Այնուհետև, ռուսական զորամասերը հունիսի 18-ին շարժվել են դեպի Միլլի-դյուզ, որտեղ այդ ժամանակ տեղավորված էր թուրքական զլխավոր ճամբարը: Շարժման ճանապարհին Կանլի գյուղում ռուսները ծանր հարված են հասցրել թուրքական հեծելազորին և դերել հրամանատար Մամիշ աղային: Հետապնդելով թուրքական ջախջախված հեծելազորին՝ ռուսական զորամասերը հասել են Զինվա, որտեղ կանգնած էր իսքը՝ սերասկյարը՝ 18 հազարանոց բանակով: Հունիսի 19-ի առավոտյան ռուսները գրոհ են սկսել թուրքական ճամբարի վրա և ջախջախել թուրքական բանակը: Գեներալ Պասկևիչը, այդ մասին զեկուցելով կայսրին, միաժամանակ նշել է. «Ես պարտավոր եմ շնոել գովեստի արժանի, ինձ հետ գտնվող մահմեդական զնդերի մասին: Բոլոր մարտերում նրանք կռվում են գերազանց քաջությամբ, գրոհների ժամանակ լինում են առջևում, քաջաբար և վստահ գրոհելով նաև հակառակորդի հետևակի վրա և՛ դիրքերի, և՛ հրանոթների, և՛ գերիների մեծ մասը նրանք են վերցրել»⁵⁷:

Հետապնդելով ջախջախված թուրքերին՝ ռուսները, համարյա առանց դիմադրության մինչև հունիսի 25-ը գրավեցին Արդոսը, Քյորփի-քեյը և Խորառանը՝ տեղական հայերի օգնության ու ջերմ ընդունելության պայմաններում:

Առանց ծանր մարտերի հանձնվեց նաև էրզրումը, որում նորից մեծ ծառայություն մատուցեցին հայերը՝ Կարապետ եպիսկոպոսի զլխավորությամբ: Նրա գրած մի նամակը Պասկևիչին վ. Պոտտոն այսպես է բնորոշել. «Այդ նաևակը առաջինն էր, որ բացեց Պասկևիչի համար քաղաքի ներքին պատկերը և շատ օգնեց բանակցությունների ժամանակ նրա համառությանը»⁵⁸. Էրզրումի անկման գործում իր ծառայություններով քիչ դեր չկատարեց բանակցությունների ժամանակ Պասկևիչի կողմից այնտեղ ուղարկված կապիտան Ղորղանյանը: Ինչպես բանակը հունիսի 27-ին մտավ էրզրում՝ վերցնելով 29 դրոշ, 150 հրանոթ և այլ ռազմավար: Գերի հանձնվեց ամբողջ կայազորը՝ սերասկյարի հետ միասին⁵⁹:

Այսպիսով, ռուսական կորպուսի համեմատաբար սակավ ուժերին հաջողվեց գրավել, Ֆ. էնգելսի արտահայտությամբ, Անատոլիայի նախադուռ էրզրումը:

Էրզրումի գրավումից հետո նրա նահանգի հայ բնակչությունն անմիջապես ձեռնամուխ եղավ կամավորական ջոկատներ կազմակերպելու գործին: Մկրտիչ աղան իր միջոցներով կազմակերպեց մի հեծելազունդ: Նրա օրինակով հարյուր հոգուց բաղկացած հեծելաջոկատ ստեղծեցին հուլյները: Այդ ուժերով էլ գեներալ Պանկրատևը սկսեց հացի պաշարներ կուտակել Խնուսի շրջանում:

56 Տե՛ս Ա. Երիցյան, նշված աշխատությունը, էջ 418:

57 Потто В., Кавказская война, т. IV, ч. II, стр. 245.

58 «Утверждение русского владычества на Кавказе», т. IV, ч. II, стр. 206.

59 Նույն տեղում, էջ 248:

Հայերն ակտիվ մասնակցություն ունեցան հուլիսի 17-ին խարթ գյուղում տեղի ունեցած ճակատամարտին, որը մղում էր ղեներալ Բուրցևի զորաջոկատը՝ իր կազմում ունենալով նաև հեծյալ մահմեդական 2-րդ գունդը, մեկ հարյուրյակ հայկական հեծելազորով⁶⁰։

Նույն ժամանակ ռուսական բանակները խոշոր հաջողությունների հասան նաև բալկանյան ճակատում։ Նրանք գրավեցին Ադրիանապոլը և անմիջական սպառնալիքի տակ գրին Կոստանդնուպոլիսը։ Ռուսական բանակի հաղթանակները խուճապ առաջացրին Թուրքիայում և արևմտյան պետությունների կառավարող շրջաններում։ Ավստրիան մոբիլիզացրեց իր բանակները, Անգլիան և Ֆրանսիան իրենց նավերը մոտեցրին Պոլսին։ Նրանք միաժամանակ ճնշում գործադրեցին Ռուսաստանի վրա՝ ընդունելու թուրքական սուլթանի կողմից արված հաշտության առաջարկությունը։

1829 թ. տեպտեմբերի 2-ին Ադրիանապոլում ստորագրվեց հաշտության պայմանագիր, ըստ որի Ռուսաստանին անցան Անապան, Փոթին, Ախալցխան, Ախալքալաքը, իսկ Արևմտյան Հայաստանում նվաճված մյուս բոլոր տեղիտերիաները վերադարձվեցին թուրքերին։

Ապարդյուն անցան արևմտահայերի հույսերը, որում իրենց ռեակցիոն դերը կատարեցին արևմտյան պետությունները։ Նրանք, ոտնահարելով հայ ժողովրդի շահերը, ջանքեր չխնայեցին առգելակելու Ռուսաստանի առաջխաղացումը դեպի Արևելք։ Նրանք, ելնելով իրենց գաղութային նպատակներից և հետապնդելով Ռուսաստանին Արևելքից և Անդրկովկասից ետ պահելու իրենց տրադիցիոն քաղաքականությունը, նպաստեցին Արևմտյան Հայաստանը Թուրքիայի տիրապետության տակ մնալու գործին, որը և դարձավ այդ հատվածի հայության հետագա ողբերգության պատճառը։

Դարեր շարունակ թուրքերից հալածված հայերը այս անգամ ավելի դաժան վրեժխնդրության պետք է ենթարկվեին, որովհետև նրանք ամբողջ պատերազմի ընթացքում համագործակցել էին ռուսական զենքին։

Ստեղծված դրությունից ելքը տասնյակ հազարավոր արևմտահայեր գտան ռուսական սահմանները գաղթելու մեջ։

Պաշտոնական տվյալներով Արևմտյան Հայաստանից գաղթեցին՝ էրզրումի փաշայությունից՝ 7298 ընտանիք, Արդահանից՝ 67, Կարսի փաշայությունից՝ 2467, Բայազետի փաշայությունից՝ 4215, ընդամենը՝ 14047 ընտանիք կամ մոտ 100 000 մարդ⁶¹։ Գաղթողները բաժանվեցին երեք մեծ խմբերի և հայտնի էին էրզրումցիք, կարսեցիք և բայազետցիք անուններով։ Էրզրումցիները հիմնականում բնակվեցին Ախալցխա, Ախալքալաք քաղաքներում և նրանց շրջակայքում։ Հայ կաթոլիկների մի մասը տեղավորվեց Լոռու, Շիրակի գյուղերում և բուն Գյումրիում, էրզրումի հայերի մի մասը՝ Մալկայի գյուղերում, կարսեցիները՝ Գյումրիում, Արագածի լանջերում՝ Ապարան, Թալին, բայազետցիները՝ Սևանի ափերին, Դարաչիշագում և մասամբ Սուրմալիում։

1828—1829 թթ. ռուս-թուրքական պատերազմի ժամանակ դրսևորված ու ծավալված ռուս և հայ զենքի համագործակցությունը ոչ պատահական երեվույթ էր և ոչ էլ առանձին գործիչների սուբյեկտիվ ցանկության արդյունք։ Ամբողջ հայ ժողովուրդն այդ օրերին զգում և մտածում էր միանման։ «...Հա-

⁶⁰ Потто В., Кавказская война, т. IV, ч. II, стр. 340.

⁶¹ ЦГВИА, ф. ВУА, д. 1019, л. 12—13.

յաստանի հայերը,—գրում է լեոն,—վճռականորեն և բացարձակապես ցույց տվին, թե իրենք էլ ճիշտ նույն կերպ են զգում և տենչում, ինչպես իրենց եղբայրներն Անդրկովկասում: Այս մի շատ խոր խորհուրդ էր, որ առաջին անգամ Լեոնան էր հանում հայոց պատմությունը... Հայոց հարցն արդեն լուծվել էր Արաքսի ափերում: Միևնույն կերպով նա լուծում պիտի գտներ և Եփրատի, Տիգրիսի, Վանա լճի ավազաններում: ...Թուրքահայ ժողովրդին էլ մեծափայլ եռանդով ընդգրկեց (նույն ազատագրական շարժումը, որ մենք տեսանք արևելյան հայություն մեջ»⁶²: Այո, հայ ժողովուրդը միատեսակ էր մտածում, ուներ միանման հոգեբանություն, թեև դաժան ճակատագիրը բաժանել էր նրա հատվածները:

1828—1829 թթ. ռուս-թուրքական պատերազմի ժամանակաշրջանում ամբողջ հայ ժողովուրդը համակրանքով էր լցված դեպի ռուսները: Սակայն մենք հավաքած չենք հավասարության նշան դնելու հայ հասարակական բոլոր խավերի՝ ռուսական Կովկասյան կորպուսին ցույց տրված օգնության մեջ: Այդ հարցում բացարձակ կեղծիք է կատարում ցարական պաշտոնական պատմագրությունը, երբ հիմնական տեղը տալով առանձին ազնվական և հոգևորական գործիչներին, համարյա թե լուռության է մատնում հասարակ ժողովրդին: Այդ տեսակետից միանգամայն իրավացի է Բաֆֆին, երբ իր «Սամվել»-ի առաջաբանում գրում է. «Մեր պատմության մեջ գրեթե մոռացված է ամբոխը: Մեր պատմագիրները չեն նկատել, որ բացի թագավորներից և իշխաններից, բացի հոգևորականներից և զինվորներից Հայաստանում կար և ժողովուրդ...»⁶³: Այդ օգնությունն ամենից առաջ ցույց տվեցին աշխատավոր գյուղացիական մասսաները: Նրանք էին, որ շատ դեպքերում տարերայնորեն կազմակերպեցին աշխարհագորային ջոկատներ, կամավորական դրուժինաներ: Նրանք տնտեսական և այլ կարգի բազմապիսի օգնություն էին կազմակերպում ռուսական զինված ուժերին՝ ընդդեմ թուրքական հարստահարիչների: Զպետք է մոռանալ նաև այն, որ պատմական այդ ժամանակաշրջանում հայ ազատագրական շարժման ամենահետևողական ուժը և նրանում ամենից ավելի շահագրգռվածն աշխատավոր գյուղացիությունն էր: Նա էր, որ ամենից շատ էր տառապում թուրքական իշխանությունների արյունոտ ճիրաններում:

Ճիշտ է, այդ պատերազմից հետո չիրականացան հայերի հույսերը, բայց ռուս և հայ զենքի համագործակցությունը խոր արմատներ գցեց և նոր ուժով պոռթկաց 1853—1856 թթ. Ղրիմի պատերազմի տարիներին, երբ հայ ժողովուրդը նորից համագործակցելով ռուսական զենքին՝ ձախողեց թուրքերի և նրանց դաշնակից անգլո-ֆրանսիական գաղութարարների՝ Անդրկովկասը զավթելու պլանները, 1877—1878 թթ. ռուս-թուրքական պատերազմի ժամանակ, երբ այդ համագործակցության հետևանքով թուրքական տիրապետությունից ազատագրվեց Հայաստանի մի հատվածը՝ Կարսի մարզը:

⁶² «Համրավարեր», 1916, № 9:

⁶³ Բաֆֆի, հրկեր, հ. 7, Երևան, 1963, էջ 6:

А. М. ПОГОСЯН

КАВКАЗСКИЙ ФРОНТ РУССКО-ТУРЕЦКОЙ ВОЙНЫ
1828—1829 гг. И УЧАСТИЕ АРМЯН

Р е з ю м е

Статья посвящена одному из этапов военного сотрудничества русского и армянского народов — помощи армян русской армии в военных действиях на Кавказском фронте в 1828—1829 гг.

Вопрос военного сотрудничества двух народов в русско-турецкой войне 1828—1829 гг. имеет важное значение для целостного изучения истории армянского народа. Сотрудничество армян с русской армией вытекало не из колониальной политики царизма, а из стремления армян избавиться от турецкого ига при помощи победоносного русского оружия. Это сотрудничество сыграло важную роль в обеспечении побед Отдельного Кавказского корпуса на Кавказском фронте.

Эта помощь выразилась в организации как в восточной, так и в западной частях Армении, добровольной милиции и отрядов народного ополчения, которые совместно с отрядами, созданными другими закавказскими народами, рука об руку с русскими частями воевали против общего врага, выполняя службы погранохраны, сопровождения, разведки и др. Армяне оказывали русской армии также материальную и моральную помощь.